

(٩)

النشيد الوطني (لا شئك على واجب)

مش هشكر ك

ولا همحى اسمك اللى موشوم جوه قلبى واهجر ك

ولا حفصل اشكى من سكات

ولا يوم أنينى هيبقى غنوة فبقى و لحد أماً أموت

ولا عاد هيسكنى السكوت

ولا عدت هرضى بالفتات

ولا هرضى للظالم يفوت

ولا عمرى هاقبل م النهارده إنى اسيبهم ينهبوكى

أويمضغوكى ويهرسوكى يسلموكى جثة هامدة للعريس
و لو سابونى عضم مطحون جوه كيس
و بعترونى فى الربوع
تنبت بذور شجرة أمل جوه الرفات
تحمل به أرضك وتداريه سنة أو سنين
لكن فى يوم
أكيد هيتولد الجنين
بالعلم مروى بالعمل راضع حنين
ويبتدى من تانى بكرة يرسمك
ويشكلك
ميهمنيش اسمك يكون زينب إيزيس ولا بهية
بس المهم تطيرى فاردة للجوانح فى المدى أجمل صبية
جناحات فتية
جناح أمل يحى التعاسة م الوشوش
و جناح عدالة
يبدر طمأنينة و أمان جوه النفوس

ايوه مهم من الفساد والقهر إني اطهرك
ايوه الأهم إني أنول حريتي و اكشف دماغك أعرفك وأحررك
و ساعتها بس مش هعوزك تشكريني
ولا هتحتاجي للحظة إني اشكرك
و مش هشكرك

القاهرة ٢٠٠٩/١٠/١٨

